

SALSILAH RAJA-RAJA KELANTAN SEJAK LONG YUNUS HINGGA SULTAN MUHAMMAD V

ABDUL RAZAK @ MOHAMAD BIN MAHMUD *

Abstrak

Artikel ini menghuraikan tentang salasilah pemerintah negeri Kelantan. Bermula dengan Long Yunus yang telah menyatukan negeri Kelantan seterusnya menjadi raja, secara keseluruhan terdapat 14 orang telah memerintah Kelantan. Terdapat beberapa era yang silih berganti dari awal pemerintahan sehingga kini. Dalam keadaan biasa peralihan kuasa berlaku secara penyerahan mandat kepada generasi yang berikutnya. Akan tetapi terdapat beberapa insiden peperangan dalam peralihan kuasa disebabkan oleh faktor-faktor dalaman dan luar. Perpindahan pusat pentadbiran pemerintahan juga dinyatakan sebagai salah satu strategi untuk memperkukuhkan kekuasaan sesebuah pemerintahan. Peperangan di antara kerajaan Kelantan dan Terengganu membuktikan ada pertalian yang kukuh di antara kedua-dua negeri yang boleh dilihat sehingga kini. Secara kesimpulannya, konflik dalam pemerintahan sesuatu kerajaan samada dalaman atau luaran menjadi satu ancaman kepada keutuhan sesebuah institusi beraja.

Kata Kunci: Salasilah, Konflik dalam Pemerintahan, Mandat

Abstract

This article describes the genealogy of the state government of Kelantan. Beginning with Long Yunus who had united the state of Kelantan, there are 14 people who have ruled Kelantan. There have been several alternate eras of the early reign so far. In normal conditions the transition occurs through mandate submission for the next generation. But there are some incidents of the war in the transition caused by factors both internal and external. Relocation of public administration is also described as one of the strategies to strengthen the authority of a government. The battle between the state of Kelantan and Terengganu has proven that there is a strong bond between the two states which can be seen up to now. In conclusion, the conflict in the ruling of a government, whether internal or external can become a threat to the integrity of an institution of monarchy.

Keywords: Genealogy, Conflict in the Ruling, Mandate

* Penyelidik di Majlis Agama Islam Dan Adat Istiadat Melayu (MAIK) Negeri Kelantan

Inshaal'Lah, dalam kertas ini akan dibincangkan salsilah Raja-raja Kelantan mulai Long Yunus menyatukan negeri Kelantan dan menjadi raja dengan gelar

“Yang Dipertuan Kelantan” pada paruh kedua abad 18 hingga ke zaman

Sultan Muhammad V sekarang. Bagaimanapun, sejarah awal negeri Kelantan sebelum Long Yunus menjadi raja, atau apa-apa peristiwa sebelumnya tidak akan disentuh. Turut tidak disentuh ialah sejarah keturunan Long Yunus yang sehingga sekarang belum mencapai kata sepakat di antara ahli-ahli sejarah¹. Namun, sedikit peristiwa sejarah sebelum Long Yunus mengambil alih tampuk pemerintahan negeri Kelantan daripada raja-raja sebelumnya, turut dimasukkan sebagai latar belakang atau muqaddimah bagi kertas ini.

¹ Untuk pelbagai versi mengenai salsilah Long Yunus, sila lihat Nik Muhammad bin Nik Mohd.

Salleh “Salsilah Raja-raja Kelantan”, kertas kerja bilangan I Seminar Sejarah dan Budaya

Wilayah Kelantan pada 12 – 15 April 1980 di Kota Bharu, hal. 33 – 45. Lihat juga Muhammad Husin Khal'i Haji Awang, Kelantan Dari Zaman ke Zaman, Syarikat Dian Sdn. Bhd, Kota Bharu, 1970, hal. 7 – 11 dan Haji Nik Mahmud bin Ismail, Ringkasan Chetara Kelantan, al-Matba'ah al Asasiah Company, Kota Bharu, 1934, hal. 17 – 18.

1.0 Pengenalan

Raja pemerintah Kelantan yang pertama bagi wangsa pemerintah Kelantan yang ada sekarang bernama Long Yunus. Nama lengkapnya, menurut yang ditarihi oleh beberapa orang penulis sejarah Kelantan, ialah Long Yunus bin Long Sulaiman bin Long Baha. Datuknya, Long Baha, atau kadang-kadang dikenali juga dengan nama “Raja Bendang Badang” atau “Raja Tuan Besar”, menurut sumber ini, ialah raja pemerintah negeri Patani sekitar tahun 1711 hingga 1715 sebelum dijemput ke Kelantan oleh mertuanya – Raja Sakti II – bagi menjadi pemangku raja Kelantan Timur pada penghujung tahun 1715 dan kemudiannya, selepas baginda mangkat, dilantik menjadi raja Kelantan Timur dan ditabalkan pada 1719 (Abdullah Muhamed, 1981).

Menarik untuk diperhatikan bahawa pergantian penguasa negeri Kelantan daripada Raja Sakti II kepada Raja Bendang Badang ini, telah memulakan sebuah peralihan kuasa raja-raja pemerintah Kelantan dari wangsa lama, iaitu Wangsa Raja-raja Jembal kepada sebuah wangsa baru, iaitu Wangsa Long Yunus. Berawal dari Raja Bendang Badang inilah, sebuah wangsa raja-raja pemerintah yang baharu muncul di Kelantan, menggantikan wangsa sebelumnya yang berakhir dengan Raja Sakti II.

Meskipun secara rasmi dilantik menjadi Raja Kelantan Timur, namun Raja Bendang Badang pada zaman awalnya, sebelum ditabalkan, banyak memerintah dari Patani. Hal ini terjadi kerana, selain isterinya Raja Pah dari Kelantan (anak Raja Sakti II), Raja Bendang Badang juga mempunyai seorang isteri lagi di Patani (namanya tidak dikenali). Dari Raja Pah Kelantan, baginda memperoleh, antara lain, seorang putera bernama Raja Yunus yang kemudian menjadi Raja atau Sultan Patani (1729 -1749), manakala dari isteri Patani beliau beroleh, antara lain, seorang anak bernama Long Sulaiman atau kadang-kadang dipanggil juga Long Nik atau Wan Anom.

Raja Bendang Badang mangkat pada 1733, terbunuh di tangan anak saudaranya sendiri – Long Muhammad – Raja Kota Kubang Labu (Kelantan Barat) yang datang menyerang Kota Pangkalan Datu, ibu kota kerajaan Kelantan Timur (Abdullah Muhamed, 1981). Selepas kemangkatan ini, negeri Kelantan Timur diperintah oleh anakanda baginda, Long Sulaiman bin Long Baha.

Peperangan di antara dua kota Kelantan Timur dan Kelantan Barat ini mengambil masa yang lama dalam sejarah Kelantan. Maka boleh dikatakan, sebelum muncul Long Yunus sebagai tokoh pemersatu negeri Kelantan pada paruh kedua abad 18, peperangan saudara ini telah berlangsung sekitar dua dekad lebih sedikit (1733 – 1765).

Pada tahun 1746, Raja Long Muhammad dikalahkan oleh Sultan Yunus Patani (Abdullah Muhamed, 1981), tetapi beliau (Long Muhammad) segera mendapat suaka politik daripada Long Abdul Rahman Baginda, Raja Legeh, sebuah negeri kecil yang terletak antara Kelantan dengan Patani. Selepas kekalahan ini,

Sultan Yunus Patani mengangkat saudaranya, dari ibu berlainan, Long Sulaiman menjadi Raja Kelantan Timur, manakala Kelantan Barat tetap berada di bawah Patani selaku negeri vassal, dengan Long Sulaiman sendiri dilantik menjadi “wakilnya”. Pada tahun 1750, berikutan penyerahan wilayah Kelantan Barat oleh Raja Long Noh Patani kepada Long Sulaiman, baginda (Long Sulaiman) telah memindahkan ibukota kerajaan dari Kota Pangkalan Datu ke Kota Kubang Labu. Perpindahan ini segera mengakhiri pembahagian negeri Kelantan kepada dua bahagian yang telah dimulakan oleh Raja Mas Kelantan pada 1698 dahulu (Abdullah Muhamed, 1987).

Tidak lama selepas peristiwa ini, terjadi pertelingkahan di antara Kelantan dengan Legeh. Raja Legeh, Long Abdul Rahman Baginda @ Long Deraman yang telah memberi suaka politik kepada Long Muhammad selepas dikalahkan oleh Sultan Yunus Patani pada 1746 dahulu, kini berusaha menjatuhkan Long Sulaiman daripada takhta kerajaan Kelantan bagi menaikkan semula anak suakanya memerintah di Kota Kubang Labu. Usaha-usaha yang dilakukan secara diplomatik gagal. Pada akhirnya terjadilah peperangan berkali-kali di antara Kelantan dengan Legeh yang berakhir dengan gugurnya Long Sulaiman pada 1756 (makamnya terletak di Kampung Dusun, Wakaf Bharu). Long Muhammad, calon yang disokong oleh Legeh diangkat sekali lagi merajai negeri Kelantan yang kini telah disatukan. Ironisnya, tidak lama kemudian, kira-kira dalam tahun 1757, ia (Long Muhammad) mati terbunuh di tangan Long Abdul Rahman Baginda sendiri, raja Legeh yang dahulu mengangkatnya menjadi raja Kelantan, natijah daripada suatu peristiwa tragis yang berpunca daripada “Kain Cindai” yang ceritanya sangat masyhur dalam sejarah Kelantan itu.

Selepas peristiwa ini, Legeh mula campur tangan dalam politik negeri Kelantan. Raja Long Abdul Rahman Baginda kemudian melantik Long Pandak (adik Long Muhammad yang dibunuhnya), menjadi raja Kelantan yang baharu di kota Kubang Labu.

Pengaruh Legeh di Kelantan menjadi semakin kuat selepas ini. Pada zaman Long Pandak menjadi raja, Negeri Kelantan “seolah-olah” terletak di bawah telunjuk Long Abdul Rahman Baginda, raja negeri Legeh yang beribu negeri di Kota Bukit Jarum itu.

2.0 Kelantan Bersatu di bawah Long Yunus

Raja Long Sulaiman yang terbunuh dalam serangan Legeh ke atas Kelantan pada tahun 1756, meninggalkan seorang putera tunggal yang ditinggalkannya sewaktu masih dalam kandungan bondanya di Patani, kira-kira dalam tahun 1701. Putera tunggalnya ini bernama Long Yunus. Setelah besar, ia dihalau oleh bonda angkatnya, Raja Perempuan Patani – Raja Mas Chayam – lalu membawa diri ke Kelantan, hidup bersama rakyat jembel di kampung-kampung. Meskipun beberapa lama kemudian ia bertemu kembali dengan ayahnya, namun ia tidak pernah punya cita-cita untuk menjadi pembesar, apalagi menjadi raja. Ia tetap hidup bersama kawan-kawannya dari kalangan rakyat biasa. Ia pernah hidup sebagai juara ayam

laga bersama sahabat karibnya, Long Gafar, putera seorang pembesar kerajaan Reman. Mereka berdua pergi menyabung ayam ke merata-rata tempat dan kampung dan pernah diundang hingga ke Kuala Terengganu dan Legeh. Namun, mereka tidak melakukan perjudian dalam penyabungan-penyabungan ini. Kalau mereka menang, mereka tidak mengambil wang atau apa-apa barang dari lawan-lawan mereka.

Sahabat karibnya, Long Gafar, berangkat ke Terengganu. Pada waktu ini Kelantan sedang diperintah oleh adik Long Muhammad, Long Pandak, yang memerintah di bawah pengaruh Legeh. Di Terengganu, kedua-dua Long Yunus dan Long Gafar berjaya memenangi hati Yang DiPertuan Terengganu, berikutan kejayaannya mengalahkan panglima Bugis dalam suatu peristiwa sabungan ayam yang nyaris-nyaris menyebabkan hampir separuh negeri Terengganu, mulai dari Seberang Takir hingga ke Kuala Setiu, terlepas ke tangan Panglima Bugis termaklum. Selama di Terengganu, Long Yunus sempat berkahwin dengan dengan Tuan Jumat binti Ku Tuan Wangsa, anak saudara kepada Sultan Mansur I Terengganu, dan menetap di Bukit Datu, dan kemudiannya di Losong.

Semasa di Terengganu inilah Long Yunus mendapat berita dari Kelantan yang mengabarkan bahawa Raja Long Pandak sedang membangun sebuah angkatan perang yang besar, terdiri daripada pria dan wanita untuk menakluk Terengganu. Serangan ini, menurut maklumat, akan dilancarkan pada tahun 1759. Akar daripada serangan ini berpunca daripada angkara Long Abdul Rahman Baginda, Raja Legeh yang telah memainkan peranannya ke atas politik Kelantan selepas mengalahkan Long Sulaiman, ayahanda Long Yunus di Kota Kubang Labu pada tahun 1756 dahulu. Dua orang raja Kota Kubang Labu selepas Long Sulaiman, Long Muhammad dan adiknya Long Pandak, adalah raja-raja yang disokong oleh Legeh belaka. Bagi maksud mengukuhkan pengaruh politiknya ke atas Kelantan, Raja Legeh merasa tidak selamat jika sekiranya Long Yunus, pewaris sebenar takhta kerajaan Kelantan selepas Long Sulaiman, masih hidup.

Sebenarnya Raja Legeh merasa sangat curiga terhadap Long Yunus. Gerak gerik dan tindak tanduk Long Yunus selalu diperhati dan diintip oleh Raja Legeh yang ambitious ini. Apabila Long Yunus pergi menyabung ayam ke Terengganu, baginda merasa bahawa pemergian itu adalah pemergian seseorang yang sedang mengatur langkah bagi mendapatkan semula takhta ayahnya yang dirampas. Kecurigaan ini bertambah jelas apabila Long Yunus bersahabat karib dengan Long Gafar, putera seorang pembesar dalam kerajaan Reman, sebuah wilayah yang bersempadan dengan Legeh di sebelah barat dan utara. Tidak mungkinkah kedua-dua orang ini bergabung tenaga bagi menyerang Kelantan dan Legeh sekali gus dari Terengganu dan Reman? Fikir baginda.

Didorong oleh rasa kecurigaan ini, Raja Legeh yang memang bersalah itu berpakat dengan Long Pandak, Raja Kelantan yang berada di bawah pengaruhnya, agar menyiapkan bala tentera bagi menekan Long Yunus sebelum Long Yunus bangkit bertindak terlebih dahulu. Khabar persiapan perang inilah yang didengar oleh Long Yunus pada waktu beliau berada di Terengganu.

Berita-berita ini sangat mencemaskan Long Yunus. Bukan sahaja berita persiapan perang yang didengarnya, akan tetapi lebih dari itu ialah berita kekejaman Long Pandak ke atas rakyat Kelantan. Dalam usahanya membina angkatan perang ini, Long Pandak telah bertindak zalim ke atas rakyat. Bagi mendapatkan tenaga tentera belia, baginda telah melaksanakan sistem kerahan tenaga secara paksa. Satu pasukan petugas dikirim ke kampung-kampung bagi merampas panen penduduk untuk dijadikan persediaan makanan tentera yang sangat besar jumlahnya. Mana-mana yang enggan menyerah dibunuh. Selain itu terdapat juga sumber yang menyatakan bahawa baginda bertindak kejam merampas perempuan dan anak gadis orang untuk dijadikan gundik pemuas nafsu.

Bila mendengar berita penganiyaan ini, Long Yunus yang tidak pernah terlibat dalam politik, apalagi dalam perebutan kuasa untuk menjadi raja, memohon bantuan daripada Yang DiPertuan Terengganu (Sultan Mansur I) yang pada waktu itu baru pulang dari Riau, bagi menyerang Kelantan. Kerana sudah terjadi hubungan kekeluargaan dengan Long Yunus, di samping baginda sendiri pun pernah merasa terhutang budi, maka mudahlah bagi baginda menerima pelawaan Long Yunus. Selain dari Terengganu, bantuan juga diperoleh dari Riau, Reman serta daripada sukarelawan Kelantan yang sangat tidak bersetuju dengan pemerintahan Long Pandak.

Selepas mengatur persiapan yang rapi, Long Yunus bersama Long Gafar memimpin tentera gabungan ini menuju Kelantan melalui jalan laut, lalu menyerang benteng Kota Kubang Labu pada waktu malam. Serangan ini terjadi selama 10 hari pada bahagian awal tahun 1759. Kedua-dua Raja Legeh (Long Abdul Rahman Baginda @Long Deraman) dan Raja Kubang Labu (Long Pandak) terbunuh dalam serangan ini. Angkatan Long Yunus kemudiannya, selepas berjaya menawan Kota Kubang Labu, telah membebaskan semua tentera belia yang dikumpulkan di dalam benteng kota dan lain-lain benteng serta mengarahkan mereka supaya pulang ke rumah masing-masing. Dengan pembubaran tentera yang besar ini, Terengganu dapat diselamatkan daripada serangan tentera gabungan Kelantan – Legeh, manakala rakyat Kelantan pula dapat dihindarkan daripada sebuah pemerintahan yang serakah dan zalim.

Serangan Long Yunus dan sekutu-sekutunya ini bolehlah dianggap sebagai satu perjuangan merebut haknya yang dirampas sekaligus perjuangan balas dendam (ingat: Long Abdul Rahman Baginda adalah pembunuh Long Sulaiman, ayahanda Long Yunus, dan orang yang bertanggung jawab melantik Long Muhammad dan kemudiannya Long Pandak menjadi Raja di Kota Kubang Labu dengan mengenyepikan Long Yunus selaku waris yang berhak).

Meskipun demikian, tindakan Long Yunus ini telah menjadi permulaan kepada suatu siri peperangan yang panjang dan lama di antara Legeh dengan Kelantan. Kedua-dua pihak saling menyerang berkali-kali. Kemuncak daripada peperangan ini menyaksikan kejayaan Long Yunus menyingkirkan pengaruh Legeh di Kelantan, lalu mengisytiharkan dirinya menjadi “Yang DiPertuan Kelantan” di Kota Kubang Labu pada tahun 1765.

Long Gafar sahabat setia yang banyak membantu Long Yunus, dilantik menjadi Mangkubumi merangkap Panglima Perang bergelar Tengku Sri Maharaja Perdana Menteri dengan diberi kuasa istimewa memerintah negeri Kelantan selaku Pesuruhjaya bagi kawasan yang bermula dari Pasir Tumboh hingga ke laut, ke timur hingga ke sempadan Terengganu, ke barat hingga ke sungai Kelantan dan ke selatan hingga ke Kuala Krai.

Dengan pelantikan Long Yunus menjadi Yang DiPertuan Kelantan dan Long Gafar menjadi Mangkubumi, maka suatu era baharu dalam sejarah negeri Kelantan telah bermula. Negeri Kelantan yang lama yang pernah terpecah kepada dua bahagian barat dan timur, telah berakhir, sebagaimana juga berakhirnya pengaruh Patani dan Legeh ke atas Kelantan. Kelantan yang muncul di bawah Long Yunus sekarang ialah sebuah negeri Kelantan yang bersatu dan bebas daripada mana-mana pengaruh. Di sinilah letaknya peranan dan ketokohan Long Yunus dalam sejarah Kelantan. Baginda adalah wira yang menyatukan negeri, sekaligus peletak batu asas bagi sebuah wangsa kesultanan yang baharu yang berlanjutan hingga sekarang.

Dalam tahun 1777, Raja Long Yunus memindahkan ibu kota kerajaannya dari Kota Kubang Labu ke tebing sebelah timur Sungai Kelantan. Tapak asal bagi ibu kota yang baharu ini terletak di Kampung Sireh dan pada mulanya bernama "Pangkalan Galoh" yang bererti "Pangkalan Permata". Apabila kota ini berkembang beberapa dekad kemudian, ia lalu berubah nama menjadi "Kota Bharu" dan nama ini kekal dipakai sehingga sekarang.

3.0 Peperangan dengan Terengganu

Selepas Long Yunus mangkat pada 27 Zulhijjah 1209 (bersamaan 15 Julai 1795), takhta kerajaan Kelantan tidak digantikan oleh putera sulungnya Long Muhammad, sebaliknya diberikan kepada menantunya – Tengku Muhammad bin Tuan Dalam @ Sultan Mansur I Terengganu (suami kepada Cik Ku Tuan Nawi @ Che Wan Teh). Baginda memerintah dengan gelaran Yam Tuan atau Yang DiPertuan Kelantan sehingga tahun 1800 sebelum dapat direbut kembali oleh iparnya, Long Muhammad bin Long Yunus.

Tidak jelas mengapa pergantian seperti ini boleh berlaku. Sumber Terengganu menyebut bahawa peralihan kuasa kepada Tengku Muhammad memang telah disepakati oleh Long Yunus dengan sahabatnya Sultan Mansur I, sejak masa baginda merancang serangan ke atas Kelantan dahulu. Menurut sumber ini, Long Yunus sendiri datang ke Terengganu mengadap Sultan Mansur I memohon agar putera baginda menjadi Raja Kelantan. "Maka dengan pilihan Long Yunus sendiri dibawa Tengku Muhammad (putera Sultan Mansur I – P.) ke Kelantan serta dikahwinkannya dengan anaknya yang bernama Che Ku Wan Teh", kata sumber ini.



Pertabalan Tengku Muhammad menjadi Raja Kelantan dengan gelar “Yang DiPertuan Kelantan”, menurut sumber ini berlaku pada 1209 Hijriyah (1795). Turut hadir dalam istiadat ini, selain Sultan Mansur I, ialah Sultan Mahmud dari Lingga, yang kebetulan sedang melawat Terengganu pada waktu itu. Tidak lama selepas peristiwa ini, Long Yunus pun meninggal dunia pada 27 Zulhijjah 1209. “Maka tinggallah Yang DiPertuan Kelantan memerintah negeri itu dengan dibantu oleh anak-anak Long Yunus, antaranya Long Mamat, Long Zainal, Long Tan, Long Ismail, Long Muda dan Long Yusuf (MISBAHA, 1979).

Dari fakta ini sangat jelas diketahui betapa besar pengaruh Terengganu ke atas Kelantan sehingga Long Yunus bersedia menyingkirkan anak-anaknya sendiri daripada mewarisi takhta kerajaannya, bagi memberi ruang kepada putera Sultan Mansur I menggantikan baginda. Adalah tidak menasabah, menurut sumber ini, seorang pemerintah segagah Long Yunus tidak menetapkan seorang pengganti baginda secara khusus, kalau sekiranya baginda tidak terikat dengan suatu understanding dengan Terengganu terlebih dahulu.

Akan tetapi kesahihan sumber ini dibantah oleh sumber Kelantan yang menyebut bahawa ketiadaan kata sepakat di antara anak-anak Long Yunus (kerana masing-masing mahu menjadi raja bagi menggantikan ayahanda baginda), telah menjadi penyebab kepada pilihan akhirnya jatuh kepada menantu baginda – suami kepada Che Ku Tuan Nawi @ Che Wan Teh. Pada mulanya sebagai Pemangku Yang DiPertuan untuk tempoh selama 100 hari (iaitu sehingga ke hari majlis jamuan ke 100 kemangkatan Long Yunus), akan tetapi kemudian telah menjadi “berurat berakar” sehingga memerlukan kepada suatu peperangan buat mengusirnya daripada takhta (Nik Mahmud ismail, 1934).

Hampir lima tahun lamanya putera-putera Long Yunus mengambil waktu dan bersabar, namun Tengku Muhammad tetap tidak mahu melepaskan takhta yang didudukinya. Selepas usaha-usaha diplomatik gagal, pada tahun 1799 putera-putera Long Yunus bangkit mengangkat senjata mengepung Istana Galoh, tempat Tengku Muhammad bersemayam, dan mengalahkannya. Selepas peristiwa ini, Tengku Muhammad pulang ke Terengganu, mendapatkan bantuan kekandanya Sultan Zainal Abidin II, bagi menyerang Kelantan.

Pada tahap ini, peperangan Kelantan – Terengganu tampaknya seperti tak dapat dielakkan. Pada tahun 1800 (sesetengah sumber menyebut tahun 1801), Terengganu dengan dibantu oleh Patani, menyerang Kelantan, dan Kelantan kalah oleh serangan dari dua penjurut ini (Nik Mahmud Ismail, 1934). Tetapi tidak lama, pada pertengahan tahun 1801, Long Muhammad, putera Long Yunus, dengan dibantu oleh saudara-saudaranya Long Tam (Long Hitam) dan Long Jenal, melancarkan serangan balas dari Ulu Kelantan dan berjaya membebaskan kembali negeri Kelantan daripada pendudukan lawannya.

Selepas peperangan selesai, Long Muhammad dipersetujui menjadi raja pemerintah negeri Kelantan yang baharu dengan gelaran “Sultan Muhammad I”.

Agar tidak timbul ancaman-ancaman daripada Terengganu, pada tahun 1812 (W.A.R Wood) namun sesetengah sumber menyebut pada 1832 (Muhamad Husin Khal'i Haji Awang-1970, Saad Shukri bin Haji Muda-1971), Sultan Muhammad I telah mengadakan hubungan diplomatik dengan sebuah negara kuasa besar yang berjiran ketika itu, iaitu Siam. Inilah permulaan bagi wujudnya hubungan Kelantan – Siam dalam bentuk Ufti Bunga Mas setiap tiga tahun sekali. Ufti ini, bersama-sama dengan utusan baginda kepada Maharaja Siam, dihantar setiap tiga tahun sekali dan dibalas oleh Maharaja Siam dengan beraneka hadiah yang berharga pula. Hasil daripada hubungan diplomatik ini, pihak Terengganu tidak lagi menunjukkan permusuhannya secara terbuka terhadap Kelantan.

Kedudukan hubungan Kelantan – Siam pada zaman Sultan Muhammad I ini bolehlah disamakan dengan hubungan Melaka – China pada zaman Parameswara mula-mula mengasaskan Kesultanan Melaka pada awal abad ke 15 dahulu.

4.0 Perang Saudara 1837 – 1839

Sultan Muhammad I memerintah dalam waktu yang agak lama, iaitu sehingga tahun 1837 apabila baginda mangkat tanpa meninggalkan pewaris takhta (MBRAS, 1966). Kemangkatan seperti ini telah menyebabkan Negeri Kelantan sekali lagi berada dalam pertikaian dan perebutan takhta. Kali ini antara saudara-saudara Sultan Muhammad I pula. Dari semua saudara-saudaranya ini, dua orang di antaranya dianggap paling layak, iaitu Engku Kota (Long Muda) dan Raja Bendahara Banggol (Long Jenal).

Oleh kerana Engku Kota telah menarik diri daripada pencalonan dalam Majlis Mesyuarat dan Muafakat (semacam Majlis Perajaan Negeri sekarang) yang diadakan sebelum jenazah Sultan Muhammad I dimakamkan, maka satu-satunya calon yang layak ialah Long Jenal atau Long Zainal gelar Raja Bendahara Banggol. Dan walaupun disedari terdapat perasaan tidak puas hati pada Tuan Senik Mulut Merah Kampung Sireh (putera Long Tam @ Raja Temenggong Arya Pahlawan) atas pencalonan ini, namun Tuan Senik Mulut Merah tidak berpeluang mengemukakan tuntutan kerana kerabat yang lebih tua telah terlebih dahulu memutuskan calon pilihan mereka – Long Jenal – bagi menjadi Yang DiPertuan Kelantan (Rahmat Saripan, 1979).

Selepas Long Jenal dilantik menjadi Yang DiPertuan Kelantan, maka Tuan Senik Mulut Merah, seperti disebut dalam Sha'ir Musuh Kelantan, tidak dapat berbuat apa-apa melainkan “.....tunduk tidak berkata-kata, menjadi payah hendak berkata, kerana berkapit (terjepit – p) dengan Engku Kota (Sha'ir Musuh Kelantan, halaman 9).

Walaupun pemilihan Long Jenal sebagai Yang DiPertuan Kelantan ini adalah sah menurut sistem pergantian pemerintah negeri pada waktu itu, kerana baginda adalah seorang putera raja dan pemilihan

baginda diputuskan dalam Majlis Mesyuarat dan Muafakat di antara kerabat-kerabat d'Raja, namun Tuan Senik Mulut Merah tetap tidak dapat menerimanya. Seolah-olah menyedari hal ini, juga bagi maksud mengawal keadaan daripada menjadi lebih buruk, Long Jenal selaku Yang DiPertuan Kelantan yang baharu, telah melantik keempat-empat putera al-Marhum Long Tam menjadi petinggi negeri; Tuan Senik Mulut Merah menjadi Raja Temenggong Arya Pahlawan (mengambil tempat ayahadanya), Tuan Senik Kota menjadi Raja Bendahara (mengambil tempat baginda), Long Nik Gagap menjadi Tengku Seri Indera dan Tuan Bongsu sebagai Raja Muda Penambang. Turut dilantik ialah Tuan Besar (putera Long Ismail Kampung Laut) sebagai Raja Kampung Laut dan Long Ahmad (putera Long Yusoff) menjadi Raja di Bukit Panchor. Tidak ada seorang pun daripada putera-putera baginda sendiri yang beroleh apa-apa jawatan dan gelaran dalam kurniaan ini (Nik Mahmud Ismail, 1934, hal 38.).

Namun diplomasi seperti ini tidak bertahan lama. Tuan Senik Mulut Merah tampaknya seperti tidak termakan pujukan. Selepas tujuh bulan menaiki takhta, pecah perang saudara di antara dua pihak yang bertelagah ini. Puak Yang DiPertuan Long Jenal disokong oleh Raja Muda Penambang (Tuan Bongsu) dan Raja di Bukit Panchor (Long Ahmad), manakala puak Tuan Senik Mulut Merah disokong kuat oleh saudara tuanya Tuan Senik Kota (Raja Bendahara yang baharu). Turut berpihak kepada Tuan Senik Mulut Merah ialah Long Sri gelar Perdana Menteri Limbat, anakanda Long Gafar yang masyhur dalam sejarah Kelantan itu.

Para penganalisis menyebut, setidak-tidaknya terdapat dua isu utama yang diusung oleh puak penentang Yang DiPertuan Long Jenal dalam kempen mereka mencari sokongan. Pertama: Kenyataan bahawa Tuan Senik Mulut Merah ialah anak angkat kepada Sultan Muhammad I dan "konon"nya telah diwasiatkan bagi menjadi pengganti baginda, dan kedua: Long Jenal disebut-sebut terlibat menjadi perancang dalam konspirasi pembunuhan ke atas Long Tam, ayahanda Tuan Senik Mulut Merah, di Galas, Ulu Kelantan. Kedua-dua isu ini malah disebut-sebut sehingga dalam sesetengah buku Sejarah Kelantan mutakhir.

Dalam hal ini adalah menarik untuk dilihat bahawa seorang penyokong kuat Tuan Senik Mulut Merah, iaitu kekandanya Tuan Senik Kota, dilaporkan ada memberitahu Abdullah Munshi (pada waktu Abdullah Munshi melawat Kelantan pada tahun 1838), bahawa peperangan merebut takhta Kelantan adalah sesuatu yang wajar. Menurutnyanya, ayahanda baginda (maksudnya: bapa saudaranya) Sultan Muhammad I, ada berkata: "..... berperanglah engkau sekalian. Barang siapa yang menang, dialah menjadi Yang DiPertuan di Kelantan ini. Maka aku pun demikian juga dahulu, sebab gagahku dan beraniku, maka aku menjadi raja di Kelantan ini....." (Kisah Pelayaran Abdullah ke Kelantan, Penerbit Fajar Bakti Sdn. Bhd., Petaling Jaya, hal. 44).

Peperangan di antara Tuan Senik Mulut Merah dengan Long Jenal berlanjutan sehingga 1839. Dan walaupun Tuan Senik berjaya mengusir Long Jenal dan merebut kekuasaannya pada penghujung tahun 1838, akan tetapi pemberontakan ini telah menjadi permulaan kepada suatu siri perang saudara yang

besar dan lama di Kelantan. Inilah peperangan yang dikenali dalam sejarah Kelantan dengan nama “Musuh Kelantan” atau “Perang Saudara 1837 – 1839”. Long Jenal yang sempat berundur ke Jakang (sebuah kampung dekat Narathiwat, Selatan Thai sekarang), kembali semula ke Kelantan pada tahun yang sama bagi melancarkan serangan balas. Kali ini dengan memperoleh penyokong yang ramai dan kuat. Peperangan ini berlanjutan sehingga 1839 dan berakhir dengan kekalahan Long Jenal, semata-mata kerana keberanian dan kedegilan tentera Tuan Senik Mulut Merah serta campurtangan pasukan tentera Siam yang pada mulanya datang untuk menjadi “orang tengah”, tetapi kemudiannya kembali berbalik memihak kepada Tuan Senik Mulut Merah. Selepas peperangan ini Long Jenal berhijrah ke Kemaman, Terengganu. Pengaruh politik Siam keatas Kelantan menjadi bertambah kuat selepas peperangan ini (Abdullah Mohamed, 1981).

5.0 Sultan Dewa Mencabar Sultan Muhammad II

Tuan Senik Kota atau Engku Kota ialah saudara tua kepada Tuan Senik Mulut Merah yang sekarang memerintah Kelantan dengan gelaran Sultan Muhammad II. Selepas berjaya menyingkir Yang DiPertuan Long Jenal dan ditabalkan menjadi raja pada 1838, Sultan Muhammad II telah mengurniakan gelaran “Sultan Dewa” kepada kekandanya Tuan Senik Kota (bekas Raja Bendahara) atas jasa-jasanya memenangkan perjuangan merebut takhta Kelantan bagi pihaknya. Dalam istiadat pengurniaan gelaran ini, baginda diberitakan telah menanggalkan dokoh pusaka yang dipakainya turun-temurun untuk disalutkan ke leher kekandanya- Tuan Senik Kota.

Kira-kira pada tahun 1841, muncul pula sebuah cerita baharu; Sultan Dewa @Tuan Senik Kota tiba-tiba merasa dirinya berhak menjadi raja pemerintah negeri Kelantan. Alasannya sangat mudah; pertama kerana baginda adalah saudara tua kepada Tuan Senik Mulut Merah yang sekarang menjadi sultan dengan nama Sultan Muhammad II, dan yang kedua, dan ini yang penting, kerana melalui usaha dan kerja keras bagindalah Long Jenal berjaya disingkirkan daripada takhta Kelantan.

Cita-cita Sultan Dewa ini telah disedari oleh adiknya Raja Muda Penambang (Tuan Bongsu), yang kemudian telah mengapi-apikan baginda agar bangkit berjuang bagi mendapatkan cita-citanya selepas beliau sendiri (Raja Muda Penambang) yang pernah berpihak kepada Long Jenal, gagal berbuat demikian. Turut memberi sokongan kepada Sultan Dewa ialah Tengku Sri Indera – Tuan Long Nik Gagap.

Berbanding dengan Sultan Muhammad II, kepimpinan Sultan Dewa disebut-sebut lebih menonjol dan karismatik. Wakil pedagang-pedagang China dari Singapura yang sampai di Kelantan pada 1838 menganggap Sultan Dewa, yang pada masa itu bergelar Raja Bendahara, adalah pemerintah de facto negeri Kelantan. Kenyataan ini baginda kemudiannya selaku Yang Dipertuan Kelantan dicabar oleh saudaranya Long Senik Mulut Merah, maka mudah dimengerti kenapa Siam mengambil sikap berpihak kepada Long Senik (lihat juga Abdul Razak Mahmud, Ikhtisar Sejarah Kelantan, Pustaka Aman Press, Kota Bharu, 2005, hal. 175 -177) menyiratkan sedikit sebanyak pengaruh serta kedudukan Sultan Dewa

sebagai calon utama bagi mewarisi takhta kerajaan negeri Kelantan pada masa itu.

Apabila Siam (Rama III) mengiktiraf kedudukan Sultan Muhammad II sebagai raja pemerintah Kelantan dengan memberi gelar “Phya Pipit Pakdi”, maka Siam juga, pada masa yang sama, memberi gelar “Phya Chao Puan” kepada Sultan Dewa. Pemberian gelaran ini seolah-olah memperakukan kedudukan Sultan Dewa selaku raja pemerintah negeri Kelantan yang kedua selepas Sultan Muhammad II.

Tetapi, seperti pada peristiwa Perang Saudara sebelumnya, kedudukan Sultan Muhammad II sekali lagi diselamatkan oleh faktor keberpihakan Siam kepadanya. Adalah menjadi dasar Rama III pada waktu ini untuk melihat satu suasana politik yang tenang dan stabil wujud di Kelantan. Selepas menghadapi Pemberontakan Patani pada 1832 dan peperangan dengan Kedah pada 1838 – 1839, Siam merasa perlu untuk tidak terlibat dalam mana-mana peperangan dengan negeri-negeri Melayu. Dan oleh kerana krisis politik Kelantan ini terjadi tidak lama selepas kedua-dua peristiwa ini, maka Siam tampaknya sangat cenderung untuk menyelesaikannya melalui cara-cara “bukan perang”. Antaranya, seperti yang dapat dilihat, ialah upayanya memberi sokongan kepada Tuan Senik Mulut Merah dalam perlawanannya menentang Yang DiPertuan Long Jenal dan tindakannya melantik Tuan Besar (Raja Kampung Laut) menjadi raja di Nongchik (1842) dan kemudiannya di Patani (1845) dalam usahanya menyelesaikan krisis politik antara Sultan Muhammad II dengan Raja Kampung Laut yang berbangkit tidak lama selepas Sultan Muhammad II menaiki takhta.

Dan sekarang muncul pula krisis baharu – tuntutan Sultan Dewa ke atas takhta Kelantan. Dalam hal ini, sama seperti yang dapat dilihat pada peristiwa sebelumnya juga, dalam usahanya memastikan kedudukan Sultan Muhammad II tidak tercabar, Siam telah menjadikan “Tujuh Negeri Melayu Kecil” (Khaek Jet Huamuang) sebagai wadah atau jalan keluar bagi mengatasi masalah-masalah politiknya di Kelantan. Caranya ialah dengan membawa keluar tokoh-tokoh yang terlibat dalam krisis politik Kelantan dan menempatkannya di salah sebuah “Tujuh Negeri Melayu Kecil” ini sebagai raja (baca: gabenor). Dalam kes Sultan Dewa, usaha-usaha telah dibuat bagi memerangkap baginda dalam suatu majlis santapan d’Raja dan membawanya ke Chaya, di mana baginda “dipaksa” tinggal di sana sehingga tahun 1853 sebelum Siam melantiknya menjadi raja di negeri Jambu (Yaring). Tidak lama selepas menerima pelantikan ini, baginda ditakdirkan mangkat di Jambu pada tahun berikutnya (1854).

Adapun Raja Muda Penambang (Tuan Bongsu) dan Tengku Sri Indera (Tuan Long Nik Gagap), maka ia terlepas daripada hukuman “buang negeri” kerana kejayaannya meyakinkan pihak berkuasa Siam dan pemerintah negeri Kelantan, bahawa baginda-baginda tetap taat dan setia kepada Sultan dan negerinya (Rahmat Saripan, 1979)

Demikianlah, menjelang 1842, krisis politik dan perebutan ke atas takhta Kelantan telah dapat diselesaikan berkat campurtangan Siam. Selepas penyingkiran tokoh-tokoh ini – Long Jenal, Tuan Besar dan Sultan

Dewa – pengaruh politik Siam menjadi sangat besar dan merupakan sesuatu yang tak dapat dielakkan dalam politik tradisional negeri Kelantan.

6.0 Perebutan Takhta 1890

Kemangkatan Sultan Ahmad pada senja hari Selasa 6 Rejab 1307 (bersamaan 15 Februari 1890) telah menyebabkan negeri Kelantan sekali lagi menyaksikan perebutan ke atas takhta kerajaannya. Kali ini bukan kerana putus zuriat seperti pada kemangkatan Sultan Muhammad I dahulu, tetapi justeru kerana terlalu ramai putera-putera al-Marhum yang merasa layak menjadi sultan. Setidak-tidaknya terdapat tiga orang putera Sultan Ahmad yang bersaing merebut takhta. Mereka ialah Long Kundur, Long Mansur dan Long Muhammad. Turut meramaikan bursa calon ialah saudara lelaki tunggal Sultan Ahmad sendiri – Long Jaafar atau Tuan Abdul Ghafar – yang pada masa kekandanya Sultan Ahmad memerintah Kelantan telah bergelar “Tuan Putera” atau “Tengku Putera”.

Menurut sumber, Tuan Abdul Ghafar adalah calon yang paling layak dan disukai ramai bagi menjadi pemerintah Kelantan. Lagi pun ia telah bergelar Tengku Putera. Sementara itu ada juga diceritakan bahawa pelantikan Long Kundur menjadi raja pemerintah Kelantan selepas Sultan Ahmad, tidak dipersetujui oleh beberapa orang ahli kerabat d’Raja Kelantan pada waktu itu. Diceritakan melalui sumber ini, bahawa Long Kundur bukanlah calon popular berbanding calon-calon penuntut takhta yang lain. Malah, pada masa Sultan Ahmad masih hidup, baginda (Sultan Ahmad) sendiri disebut-sebut tidak bersetuju anaknya yang bernama Long Kundur itu menjadi raja menggantikan baginda (Nik Mohd. Salleh, 1980) .

Namun pada akhirnya, seperti yang dapat kita lihat, Long Kundur gelar Raja Bendahara dilantik menaiki takhta kerajaan Kelantan dengan gelaran Sultan Muhammad III. Kejayaan ini disebut-sebut banyak bergantung kepada peranan dua orang pembesar negeri yang menyokong baginda, iaitu Nik Yusof bin Nik Abdul Majid (Nik Seri Paduka) dan Dato’ Maha Menteri Che Saad (Che Ha’) anak Penghulu Ngah yang pada masa itu bergelar Dato’ Laksamana. Dalam menjayakan calon pilihannya ini, Dato’ Maha Menteri telah bertindak berangkat ke Bangkok bagi mendapatkan perkenan baginda Maharaja Siam bagi menaikkan Long Kundur ke atas takhta Kelantan. Pulang dari Bangkok, Dato’ Maha Menteri membawa seberkas surat-surat sejabat atau tauliah pelantikan yang mengesahkan kedudukan Long Kundur sebagai raja pemerintah negeri Kelantan yang baharu, di samping lain-lain surat tauliah pelantikan pembesar negeri.

Tidak lama selepas pelantikan Long Kundur (kadang-kadang dikenali dengan nama Raja Bendahara atau Sultan Bongsu) menjadi Sultan dengan gelaran Sultan Muhammad III ini, Dato’ Maha Menteri Che Ha’, mati ditembak di rumah isteri keduanya di Penampang. Pembunuhan yang berlaku pada waktu beliau bangun untuk bersahur ini dipercayai ada hubungan dengan peranan beliau yang sangat menentukan dalam pelantikan Long Kundur menjadi raja pemerintah negeri Kelantan (Mohd. Hussin Khal’i bin Haji Awang).

7.0 Perebutan Takhta 1891

Sultan Muhammad III memerintah tidak lama. Selepas lebih kurang satu tahun memerintah, baginda mangkat di Istana Jahar pada malam Isnin 11 Mei 1891 secara tiba-tiba atau mengejut. Kemangkatan baginda telah sekali lagi menyebabkan negeri Kelantan berada dalam pertikaian dan perebutan takhta di antara calon-calon yang bersaing. Malah kali ini lebih seru dan tegang.

Sedikitnya terdapat 5 orang calon dalam persaingan perebutan takhta kali ini. Mereka ialah:

1. Raja Muda Long Mansur, adinda Sultan Muhammad III.
2. Long Mahmud, juga adinda Sultan Muhammad III.
3. Long Senik, putera Sultan Muhammad III.
4. Tengku Putera @ Tuan Abdul Ghaffar, ayahanda saudara kepada Sultan Muhammad III.
5. Tuan Chik Penambang, anakanda kepada Tuan Bongsu (Raja Muda Penambang pada zaman Sultan Muhammad II).

Oleh kerana pada masa itu belum ada lagi perlembagaan bertulis mengenai urutan calon-calon yang berhak ke atas takhta kerajaan, maka seperti pada perebutan-perebutan sebelumnya, masing-masing pihak berlumba-lumba menghantar utusan ke Bangkok, dan ada juga kepada Gabenor Inggeris di Singapura, memohon sokongan supaya melantik mereka menjadi raja pemerintah negeri Kelantan.

Pada akhirnya, sekali lagi dengan sokongan kuat Dato' Seri Paduka Nik Yusoff bin Nik Abdul Majid, Raja Muda Long Mansur dilantik menjadi raja pemerintah negeri Kelantan yang baharu dengan gelaran "Raja Kelantan", iaitu mulai 1891 hingga 1898. Pada bahagian awal pemerintahannya, baginda dikatakan enggan memakai gelaran "Sultan" atas beberapa pertimbangan. Baru pada tahun 1898, iaitu selepas kerajaan Siam mengiktiraf kedudukannya, baginda mulai memakai gelar "Sultan Mansur". Gelaran ini berlanjut sehinggalah apabila baginda mangkat pada pagi Khamis 8 Februari 1900 tanpa meninggalkan putera dan puteri.

8.0 Zaman Pemerintahan Sultan Mansur

Baginda Sultan Mansur adalah seorang Sultan yang dikenali taat beragama dan wara' dalam sejarah raja-raja pemerintah Kelantan. Kalau pada zaman kekandanya – Sultan Muhammad III – beberapa penguatkuasaan undang-undang syara' telah diperkenalkan dalam bidang jenayah dan mal, maka dalam zaman pemerintahan baginda, kuatkuasa undang-undang ini lebih dipertingkat dan diperluas.

Selain pelaksanaan undang-undang hudud keatas pencuri (potong tangan) dan qisas keatas pembunuh, baginda juga menguatkuasakan undang-undang ta'zir ke atas orang-orang yang tidak berpuasa dan perempuan yang tidak menutup aurat. Ada diceritakan bahawa pada zaman baginda, mana-mana orang yang dithabitkan kesalahan kerana bermukah, dikenakan hukuman dengan cara diarak keliling pekan atau kampung sambil disuruh memberitahu orang ramai akan kesalahan yang dilakukannya. Manakala bagi perempuan yang didapati memakai pakaian yang tidak menutup aurat pula, akan dikenakan tindakan dengan cara melumurkan badan mereka dengan “belaking”.

Sultan Mansur termasuk “umara” yang mendampingi ulama’. Baginda sentiasa merundingi ulama’ dalam perkara-perkara pentadbiran negeri, lebih-lebih lagi dalam perkara-perkara agama. Inilah sebabnya kenapa pada zaman baginda, undang – undang Islam mendapat pengiktirafan dan memperoleh tempatnya yang layak dalam pemerintahan negeri. Antara ulama’ yang kerap didampingi baginda termasuklah Haji Abdul Malik Sungai Pinang, Tok Ku Syed Hakim @ Syed Muhammad bin Syed Alwi, Imam Haji Nik Wan Daud (kemudiannya dilantik menjadi mufti), Imam Haji Abdullah, Imam Haji Mahmud Tuan Padang, Haji Muhammad Ta’, Haji Ismail Langgar, Haji Daud Kampung Menuang, Haji Taib anak Tuan Padang dan Haji Nik Abdul Rahman Dakwat (Ismail Che Daud, 1991).

Sebagai seorang sultan yang berjiwa agama, baginda Sultan Mansur banyak membuat kerja-kerja khairat dan kebajikan seperti membangunkan rumah-rumah wakaf (lengkap dengan perigi) bagi para musafir. Rumah-rumah wakaf ini didirikan di tengah padang atau sawah, di persimpangan jalan utama dan di tempat-tempat strategik yang lain. Bahkan baginda jugalah yang telah menitahkan supaya dibina rumah wakaf bertingkat di kota ilmu – Makkah al Mukarramah – bagi menjadi rumah penginapan dan tempat kegiatan anak-anak Kelantan yang belajar di Masjid al Haram pada waktu itu. Rumah wakaf berkenaan kemudiannya dikenali dengan nama “rumah putih” kerana dicat putih seluruhnya (Ismail Che Daud, 1991).

9.0 Sultan Muhammad IV (1900 – 1920)

Walaupun tanpa meninggalkan putera-puteri dan telah mempunyai “Raja Kelantan” (Long Senik ibn al-Marhum Sultan Muhammad III) sebagai pewaris pertama, namun kemangkatan Sultan Mansur tetap menimbulkan perselisihan di kalangan kerabat d’Raja Kelantan bagi memilih calon pengganti. Beberapa siri perundingan telah diadakan, dengan Tuan Chik Abdullah (adik Sultan Mansur) bertindak cemerlang sebagai pendamai atau orang tengah di antara pihak-pihak yang bertelagah. Selain itu, kerajaan Siam juga telah bertindak awal pada kali ini, apabila seorang pegawai kanannya, Phya Sukhum, dihantar ke Kelantan bagi menyelesaikan sengketa ini. Dengan sokongan Siam, persetujuan akhirnya dicapai bagi melantik Long Senik, putera Sultan Muhammad III menjadi raja pemerintah Kelantan dengan gelar “Raja Kelantan”.

Apabila Long Senik menaiki takhta pada 1900, maka adindanya yang bernama Tuan Zainal Abidin dilantik

menjadi Raja Muda, iaitu bakal pemerintah Kelantan yang pertama. Manakala Tuan Ismail, putera sulong Long Senik, dilantik menjadi Tengku Seri Indera Mahkota, iaitu bakal pemerintah kedua (Saad Shukri Haji Muda, 1971). Walaupun dari segi sepatutnya, Tuan atau Tengku Ismail lebih layak bergelar Raja Muda (kerana baginda adalah putera sulong kepada Long Senik), tetapi Phya Sukhum, pegawai tinggi Siam yang diutus ke Kelantan pada waktu itu, dikatakan enggan membenarkan Tengku Ismail menjadi bakal pemerintah pertama. Oleh sebab itulah gelaran “Raja Muda” diberi kepada adinda Long Senik – Tuan Zainal Abidin .

Baru kira-kira pada tahun 1909, iaitu pada waktu kerajaan Siam sedang berunding dengan kerajaan Inggeris bagi menyerahkan negeri Kelantan kepada Inggeris, Tuan Ismail @ Tengku Ismail, melalui Tuan Chik Abdullah, memohon persetujuan kerabat d’Raja Kelantan agar baginda dibenarkan menggantikan ayahanda baginda (Long Senik) menjadi raja pemerintah Kelantan pada masa akan datang. Dengan jasa baik dan kebijaksanaan Tuan Chik Abdullah, permohonan ini diterima, tetapi dengan syarat bahawa pelantikan raja pemerintah Kelantan selepas Tengku Ismail hendaklah dirunding semula dengan kerabat d’Raja yang tua-tua daripada jalur keturunan Sultan Ahmad (Nik Muhammad Nik Mohd. Salleh).

Pada tahun 1911, kerajaan Inggeris telah mengiktiraf Tuan Long Senik yang bergelar “Raja Kelantan” sejak 1900 sebagai raja pemerintah negeri Kelantan dengan gelaran Sultan. Sejak itu baginda dipanggil Sultan Muhammad IV. Pada waktu yang sama juga, kerajaan Inggeris telah memperakukan Tengku Ismail sebagai bakal pemerintah pertama negeri Kelantan. Sejak tarikh ini – 1911 – tiadalah lagi berlaku apa-apa perselisihan atau pertikaian yang ketara dalam menentukan raja-raja pemerintah negeri Kelantan, kerana semua perantikan raja-raja selepas 1911 adalah diputuskan berdasarkan Perlembagaan Negeri Kelantan yang baharu yang tidak wujud pada zaman-zaman sebelumnya.

10.0 Raja-raja Kelantan Selepas Sultan Muhammad Ke-IV

Sultan Muhammad Ke-IV mangkat pada 23hb. Disember 1920. Putera baginda, Tengku Ismail, yang bergelar Raja Kelantan dilantik menjadi Sultan pada hari yang sama dengan gelaran Sultan Ismail dan dimahkotakan pada 12 April 1921. Selepas memerintah selama 24 tahun, baginda Sultan Ismail mangkat pada 20hb. Jun 1944. Oleh kerana baginda tidak mempunyai putera dan puteri, maka diangkat paduka adindanya, Tengku Ibrahim yang bergelar Raja Kelantan, menjadi sultan dengan gelaran Sultan Ibrahim pada 20hb. Jun 1944 dan dimahkotakan pada 31hb. Oktober 1944 (Mohamad Husin Khal’il Haji Awang, 1970). Dalam masa pemerintahan baginda, negeri Kelantan bersama-sama dengan negeri-negeri Melayu yang lain membentuk sebuah persekutuan bernama Persekutuan Tanah Melayu pada 1948 dan kemudiannya mencapai kemerdekaan daripada Inggeris pada 31hb. Ogos 1957. Baginda Sultan Ibrahim mangkat pada 9hb. Julai 1960.

Pada 10hb. Julai 1960 putera baginda, Tengku Yahya Petra (Tengku Mahkota), dimasyhurkan menjadi Sultan dengan gelaran Sultan Yahya Petra. Pada 22hb. Julai 1970 baginda terpilih menjadi Timbalan

Yang di-Pertuan Agong dan kemudiannya, di dalam Persidangan Majlis Raja-raja Melayu pada 21hb. September 1975, dipilih menjadi Duli Yang Maha Mulia Seri Paduka Baginda Yang di-Pertuan Agong Yang ke-V. Baginda mangkat di Istana Negara, Kuala Lumpur pada 29hb. Mac 1979. Jenazah baginda dibawa pulang ke Kota Bharu dan dimakamkan di Makam DiRaja Langgar, Kota Bharu.

Berikutan kemangkatan baginda, anakanda baginda, Tengku Ismail Petra (Tengku Mahkota), diisytiharkan menjadi Sultan dan Pemerintah Negeri Kelantan Darul Naim. Baginda dimahkotakan pada 30hb. Mac 1980 dan kekal memerintah negeri Kelantan sehinggalah apabila digantikan oleh anakanda baginda, Tengku Muhammad Faris Petra pada 24 Mei 2009 sebagai Pemangku Raja Kelantan dan kemudian sebagai KDYMM Sultan Muhammad V pada 13 September 2010.

11.0 Penutup

Jika dihitung daripada tarikh Long Yunus menjadi Raja pada 1765 dan menegakkan Kesultanan Kelantan yang baharu sehingga sekarang, maka usia Kesultanan Kelantan sudah menjangkau dua abad lebih sedikit. Dalam tempoh ini, sejumlah 14 orang Yang Dipertuan, Raja-raja dan Sultan telah menduduki takhta Kerajaan Negeri Kelantan.

Mereka ialah:-

1. Long Yunus bin Long Sulaiman (Yang DiPertuan): 1765 – 1795
2. Tengku Muhammad bin Tuan Dalam @ Sultan Mansur I, Terengganu (Yam Tuan atau Yang Dipertuan Kelantan): 1795 – 1801.
3. Long Muhammad bin Long Yunus (Sultan Muhammad I): 1801 – 1837. Selepas mangkat digelar Marhum Mandul.
4. Long Jenal @ Long Zainal bin Long Yunus (Yang Dipertuan): 1837 – 1838. Sebelumnya bergelar Raja Bendera Banggol, Kelantan.
5. Tuan Senik bin Long Tam bin Long Yunus (Sultan Muhammad II): 1838 – 1886. Dikenali juga dengan nama Tuan Senik Kampung Sireh atau Sultan Mulut Merah. Pernah bergelar Raja Kelantan (1830 – 1837) dan Raja Temenggong Arya Pahlawan (1837 – 1838). Se lepas mangkat ada kalanya dipanggil Marhum Tua.
6. Long Ahmad @ Long Sulung bin Tuan Senik (Sultan Ahmad): 1886 -1890. Sebelumnya pernah bergelar Tengku Indera Mahkota (1851 – 1868) dan Raja Kelantan (1868 – 1886).

Dikenali juga dengan nama Sultan Tengah atau Marhum Tengah.

7. Long Kundur bin Long Ahmad @ Long Sulung (Sultan Muhammad III): 1890 - 1891. Sebelum pernah bergelar Raja Bendahara (1868 – 1886) dan Raja Kelantan (1886 – 1890). Dikenali juga dengan nama Sultan Bendahara atau Sultan Bongsu atau Marhum Bongsu.
8. Long Mansur bin Long Ahmad @ Long Sulung: 1891 – 1900. Sebelumnya bergelar Tengku Muda (1868 – 1886) dan Raja Muda (1886 -1890). Memerintah dengan nama Raja Kelantan sehingga 1898 dan kemudiannya dengan gelaran Sultan Mansur sehingga 1900.
9. Long Senik bin Long Kundur (Sultan Muhammad ke-IV): 1900 – 1920. Sebelumnya bergelar Tengku Sri Indera Mahkota (1886 – 1890), Raja Muda (1890 – 1898) dan Raja Kelantan (1898 – 1911). Memerintah dengan nama Raja Kelantan mulai 1900 hingga 1911, dan kemudiannya dengan nama Sultan Muhammad ke-IV dari tahun 1911 hingga 1920.
10. Tengku Ismail bin Long Senik @ Sultan Muhammad ke-IV (Sultan Ismail): 1920 – 1944: Sebelumnya bergelar Sri Indera Mahkota (1900 – 1911) dan Raja Kelantan (1911 -1920).
11. Tengku Ibrahim bin Long Senik @ Sultan Muhammad ke IV (Sultan Ibrahim): 1944 -1960. Sebelumnya pernah bergelar Tengku Sri Indera Mahkota (1911 - 1921) dan Raja Kelantan (1921 – 1944).
12. Tengku Yahya Petra Ibni al-Marhum Sultan Ibrahim (Sultan Yahya Petra): 1960 – 1979. Sebelumnya pernah bergelar Tengku Temenggong (1939 – 1945), Tengku Bendahara (1945 – Januari 1948) dan Tengku Mahkota (1hb. Februari 1948 hingga 9hb. Julai 1960).
13. Tengku Ismail Petra Ibni al-Marhum Sultan Yahya Petra (Sultan Ismail Petra): 1979 - 2009. Sebelumnya pernah bergelar Tengku Mahkota Kelantan (11 November 1967 hingga 28 Mac 1979).
14. Tengku Muhammad Faris Petra Ibni Sultan Ismail Petra (Sultan Muhammad V): 2010 hingga sekarang. Sebelumnya pernah bergelar YTM Tengku Mahkota (6 Oktober 1985 – 23 Mei 2009) dan Pemangku Raja Kelantan (24 Mei 2009 – 12 September 2010).

Rujukan

Abdullah Mohamed (Nakula) (1981), *Keturunan Raja-raja Kelantan dan Peristiwa-peristiwa Bersejarah*, Perbadanan Muzium Negeri Kelantan, Kota Bharu, 1981, hal. 24 – 26.

Abdullah Mohamed (Nakula), *“Mengenal pasti beberapa ibukota tua Kelantan dalam konteks sejarah dengan tumpuan khas kepada Kota Kubang Labu”* dalam Nik Hassan Shuhaimi bin Nik Abd. Rahman (penyelenggara) *Kelantan Zaman Awal : Kajian Arkeologi dan Sejarah di Malaysia*, Perbadanan Muzium Negeri Kelantan, Kota Bharu, 1987, hal. 212.

Abdullah Mohamed (Nakula) (1981) *“Adalah dipercayai keberpihakan Siam kepada Tuan Senik Mulut Merah terjadi kerana peranan Long Jenal (Raja Bendahara Banggol) dalam Pemberontakan Patani melawan Siam pada 1832. Berbanding dengan saudara-saudara lelakinya yang lain, Long Jenal ialah anak Long Yunus yang sangat ambitious dan punya daya penciuman politik yang tajam. Sewaktu berlaku Pemberontakan Patani pada tahun berkenaan, beliau telah bertindak cemerlang dengan memimpin sendiri pasukan bantuan Kelantan dalam upayanya menyekat ekspansi Siam di negeri-negeri Melayu. Namun usaha ini gagal. Long Jenal pulang ke Kelantan dengan kecewa. Apabila kedudukan”* – Hal.32.

Ismail Che Daud (1991), *“Pemerintahan Sultan Mansur”* dalam Majalah Peristiwa, bil. 22, 1 September 1991, Dian Darulnaim Sdn. Bhd., Kota Bharu, hal. 36 -37.

Muhammad Husin Khal’i Haji Awang, Ibid., hal. 11 dan Haji Nik Mahmud bin Ismail, Ibid., hal. 20 (*dalam buku terakhir ini nama Raja Bendang Badang @ Raja Tuan Besar disebut “Long Besar”*).

MISBAHA (1978), *Terengganu Dari Bentuk Sejarah*, Utusan Publications & Distributors, Kuala Lumpur, hal. 133.

MBRAS (1966) Cyril Skinner, *The Civil War in Kelantan in 1839*, *“Tarikh tradisional bagi kemangkatan Sultan Muhammad I ialah pada tahun 1835. Tetapi Cyril Skinner berjaya membuktikan bahawa baginda mangkat dalam tahun 1837. Bukti ini didapatinya dari meneliti urutan peristiwa Perang Saudara di Kelantan berdasarkan hubungan surat menyurat antara Kelantan – Bangkok selama tempoh kejadian”*.

Muhamad Husin Khal’i Haji Awang, (1970), *dalam buku terakhir ini nama Raja Bendang Badang @ Raja Tuan Besar disebut “Long Besar”*, hal. 37 -39.

Muhamad Husin Khal’i Haji Awang (1970), hal. 44
Mohamad Husin Khal’il Haji Awang, op.cit., 1970, hal. 143.

Nik Mahmud Ismail (1934), *“Pada peperangan kali inilah, Terengganu menjanjikan kepada Patani, jika Kelantan kalah, maka negeri Kelantan akan dibahagi dua kembali; sebelah matahari jatuh Sungai Kelantan terpulang kepada Patani dan sebelah matahari naik kepada Terengganu”* hal. 29.

Nik Muhammad bin Nik Mohd. Salleh, op.cit., hal. 72.

Nik Mohd. Salleh, *“Salasilah Raja-raja Kelantan”*, kertas kerja no. 1, Seminar Sejarah dan Budaya Wilayah Kelantan pada 12 – 15 April 1980 di Kota Bharu, hal. 65 – 67.

Nik Mahmud Ismail (1934) *“Pada peperangan kali inilah, Terengganu menjanjikan kepada Patani, jika Kelantan kalah, maka negeri Kelantan akan dibahagi dua kembali; sebelah matahari jatuh Sungai Kelantan terpulang kepada Patani dan sebelah matahari naik kepada Terengganu”* hal. 33.

Rahmat Saripan (1979), *Perkembangan Politik Melayu Tradisional Kelantan 1776 – 1842, Dewan Bahasa dan Pustaka, Kuala Lumpur*, 1979, hal. 90 -91 yang memetikanya dari Sha’ir Musuh Kelantan, hal. 9.

Rahmat Saripan (1979), *Perkembangan Politik Melayu Tradisional Kelantan 1776 – 1842*, hal. 93 -95.

Saad Shukri bin Haji Muda (1971) *Detik2 Sejarah Kelantan*, Pustaka Aman Press, Kota Bharu, 1971, hal. 71.

W. A. R. Wood, *History of Siam (reprint)*, Charlermnit Bookshop, Bangkok, tanpa tarikh, hal. 275.